

四庫全書

集部

欽定四庫全書

唐詩紀事卷二十九

宋 計敏夫 撰

常袞

張衆甫

田澄

柳柳

李彥遠

薛尋

元載

張元宗

楊郇伯

高拯

梁鎰

劉長川

姚倫

孫處立

劉復

朱彬

戴叔倫

于鵠

王季文

常袞

晚秋集賢院即事寄徐薛二侍郎云穆穆上清居沉沉
中秘書金鋪深內殿石甃盡寒渠花樹臺斜倚宮煙閣
半虛縹囊鋪錦綉翠軸卷瓊琚墨潤水文繭香消蠹字
魚翻黃桐葉老吐白桂花初舊德雙遊處聯芳千載餘
北朝榮庾薛西漢盛嚴徐侍講親華辰徵詩步綺踈綴
簾金翡翠賜硯玉蟾蜍移秩東南遠離憂歲月除承明
期重入江海意何如

衮京兆人爲中書舍人文采贍蔚長於應用譽重一時

相代宗用人非文詞者擯不用世謂之齧伯

袞晚秋集賢卽事詩司空曙和云藹藹鳳凰宮蘭臺玉
署通夜霜凝樹羽曉日照和風官亞三台貴儒開百代
宗司言陳禹拜侍講發堯聰香卷青編內鈇分綠字中
綴籤從太史鏘佩揖羣公池接天泉碧林交御果紅寒
龜登故葉秋蝶戀踈叢顏謝微文並鍾裴直事同離羣
驚海鶴屬思怨江楓地遠姑蘇外山長越絕東慙當哲
匠後下曲奏難工

獨孤及和云漢家金馬署帝座紫微郎圖籍凌羣玉歌
詩冠栢梁陰陰萬年樹肅肅五經堂揮翰忘朝食研精
待夕陽晴空露盤迥秋月鎖窻涼遠興生班鬢高情寄
縹囊葳蓬雙鸞鷲夙昔並翱翔汲冢同刊謬蓬山共補
亡羌池摧羽翮流落限江湘禁省一分袂旻天三雨霜
石渠遺跡滿水國暮雲長早晚朝宣室歸時道路光
錢起和云文星垂太虛辭伯綜羣書綵筆下鴛掖褒衣
來石渠典墳探奧旨造化覩權輿述聖魯宣父通經漢

仲舒窻明宜縹帶地肅近丹除清晝刑詩暇高秋作賦
初露盤侵漢籥宮柳度鴉踈靜對連雲閣晴聞過闕車
舊僚云出矣晚歲復何如海嶠瞻歸路江城夢直廬含
毫思兩鳳望遠寄雙魚定笑巴歌拙還參麗曲餘

張衆甫

鶴詩云馴狎經時久襜褕短翮存不隨淮海變空媿稻
梁恩獨立秋天淨單棲夕露繁欲飛還歛翼誰敢望乘
軒

戴叔倫酬衆甫詩云野人無本意散木任天材分向空
山老何言上苑來超遙千里道依倚九層臺出處寧知
命輪轅豈自媒更慙張處士相與別蒿萊

衆甫送李觀之宣州謁袁中丞詩云古渡大江濱西南
距要津自當舟楫路應濟往來人翻浪驚飛鳥迴風起
綠蘋君看波上客晚歲獨垂綸

高仲武云衆甫婉媚綺錯巧用文字工於興喻只如不
隨淮海變空媿稻梁恩盡陳謝之源又自當舟楫路應

濟往來人得諷興之要形容體裁率皆如此文流之佳士也

衆甫字子初清河人年過耳順方脫章甫冠惠文爲太常寺太祝尉河南壽安縣罷秩僑居雲陽時以緣情比興疏導心術志之所之輒詣絕境待拜監察御史爲淮寧軍從事建中三年卒

權載之誌其墓

田澄

成都爲客作云蜀郡將知遠城南萬里橋衣緣鄉淚濕

貌以客愁銷地富魚爲米山芳桂是樵旅遊唯得酒今日過明朝

澄大歷天寶間人杜子美贈獻納使起居田舍人詩即澄也末句云楊雄更有河東賦惟待吹噓送上天蓋澄以舍人奉使入蜀肅宗時人也

柳柳

柳與李端盧綸友善有賊平後送客還鄉詩云他鄉生白髮舊國有青山最有思致尤長於短句如贈別云江

浦程千里離樽淚數行無論吳與楚俱是客他鄉又云
何處最悲辛長亭臨古津往來舟楫路前後別離人

李彥遠

採桑云採桑畏日高不待春眠足攀條有餘愁那矜貌
如玉千金豈不贈五馬空躑躅何以變貞性幽篁雪中
綠

彥遠大厯貞元間詩人

薛昇

勅贈康尚書美人云天門喜氣曉氛氳聖主臨軒召冠
軍欲令從此行霖雨先賜巫山一片雲康尚書日知也
德宗時斬李惟岳以功擢爲深趙節度遷奉誠軍陟晉
絳尋德宗時河東詩人也

元載

王忠嗣鎮北京以女韞秀歸元載歲久而見輕韞秀勸
之遊學元乃遊秦爲詩別韞秀曰年來誰不厭龍鍾雖
在侯門似不容看取海山寒翠樹苦遭霜霰到秦封妻

請偕行曰路掃飢寒跡天哀志氣人休零別離淚携手
入西秦

元到京屢陳時務深符上旨肅宗擢拜中書王寄諸姨
妹詩曰相闔已隨麟閣貴家風第一右丞詩笄年解笑
鳴機婦耻見蘇秦富貴時元肅代兩朝宰相貴盛無比
復為一篇以喻之曰楚竹燕歌動盡梁春蘭重換舞衣
裳公孫開館招嘉客知道浮雲不久長

元貪怯被誅上令王氏入宮歎曰二十年太原節度使

女十六年宰相妻誰能爲長信昭陽之事死亦幸矣京兆答斃

大曆五年春載早朝有獻文章者公令左右收之其人苦欲公讀公云候入中書當爲看其人言若不能讀自誦畢因亦不見詩曰城東城西舊行處城裏花飛亂如絮海鷺啣泥欲下來屋裏無人却飛去載後破家妻子被殺其一云城南路長無宿處荻花紛紛如柳絮海鷺啣泥欲作巢空室無人却飛去

張元宗

登景雲寺閣云胡馬飲河洛我家從此遷今來獨垂淚
三十六峰前

望終南山云紅塵白日長安路馬足車輪不暫閑唯有
茂陵多病客每來高處望南川

楊郇伯

妓人出家云盡出花鈿與四鄰雲鬟剪落厭殘春暫驚
風燭難留世便是蓮花不染身貝葉欲翻迷錦字梵聲

初學悞梁塵從今艷色歸空後
湘浦應無解佩人
竇常逢中立春寄懷郇伯云
浪跡終年客驚心此地春
風前獨去馬澤畔耦耕人
老大交情重悲哀物外親子
雲今在宅應見柳條新

高拯

拯及第後贈試官云公子求賢未識真
欲將毛遂比常倫
當時不及三千客
今日何如十九人

拯大厯十三年進士試官薛邕也

梁鎰

七夕泛舟云雲端有靈匹掩映拂粧臺夜久應搖珮天
高響不來片歡秋始展殘夢曉翻催却怨填河鵲留橋
又不迴

詠木老人云刻木牽絲作老翁鷄皮鶴髮與真同須臾
弄罷寂無事還似人生一夢中

明皇遷西內
曾詠此詩

古意云妾家巫峽陽羅幌寢銀床曉日臨窻久春風引
夢長落釵仍在鬢微汗欲消香縱使蒙朧覺魂還逐楚

王

錢起秋夜與鎰文宴云車到閑林下杯香蕙草時好風
能自至明月不須期秋水翻河影晴霜脆柳絲微官是
底物許日廢言詩

明皇雜錄云李輔國矯制遷明皇西宮力士竄嶺表帝
戚戚不樂日一蔬食吟詩云刻木牽絲作老翁至一夢
中不知明皇作或詠鎰詩也

劉長川

寶劍篇云寶劍不可得相逢幾許難今朝一度見赤色
照人寒匣裏星文動環邊月影殘自然神鬼伏無事莫
空彈

將赴東都上李相公云四海兵初偃平津閣正開誰知
火爐下還有不燃灰

長川肅代時詩人也

姚倫

感秋云試向疎林望方知節候殊亂聲千葉下寒影一

巢孤不蔽秋天鴈驚飛夜月烏霜風與春日幾度遣榮
枯

倫過章秀才洛陽客舍云達人心自適旅舍當閑居不
出來時徑重看讀了書晚山嵐色近斜日樹陰踈盡是
忘言客聽君誦子虛

高仲武云姚子詩雖未洪深去凡已遠屬興比事不失
文流如亂聲千葉下寒影一巢孤亦篇之秀也

倫終揚州大都府曹參軍

孫處立

詠黃鶯云欲轉聲猶澁輕飛羽未調高風不借便何處
得遷喬

處立江寧人長安中爲左拾遺善屬文嘗恨天下無書
以廣新聞神龍初桓彥範等用事處立遺書論時事得
失不得用乃去官還鄉以病卒

劉復

寺居清晨云高枕對曉月衣巾清且涼露華朝未晞滴

瀝含虛光隔竹聞
汲井開扉見焚香
幽心感衰病結念
依法王青冥早雲
飛杳渺空鳥翔此
情皆有釋悠然知
所忘

經禁城云日没路
且長遊子欲涕零
荒城無人路秋草
飛寒螢東南古邛
墟莽蒼馳郊垞黃
雲晦斷岬枯井臨
崩亭昔人竟何之
窮泉獨冥冥蒼苔
没碑版朽骨無精
靈俛仰寄世間忽
如流波萍金石非
汝壽浮生等臊腥
不如學神仙服石
求丹經

遊仙云稅駕倚扶桑道遙望九州二老佐軒轅移戈戮
蚩尤功成棄之去乘龍上天遊天上見玉皇壽與天地
休俯視崑崙宮五城十二樓王母何窈渺玉質清且柔
揚袂折瓊芳寄我天東頭相思千萬歲大運浩悠悠安
用知吾道日月不能周寄音青鳥翼謝爾碧海流

送王倫詩云春天日未曛楚客酣送君翩翩孤黃鶴萬
里滄洲雲四方各有心豈得常顧羣山連巴湘遠水與
荆吳分清光日阻脩尺素安可論相思寄夢寐瑤草空

氛氲

出三城別幕中三判官詩云翔禽託高柯倦客念主人
思義有所知四海同一身況皆曠大姿翰音見良辰陳
規佐武略高統據要津常願投素誠今果得所申金壘
列四座廣廈無氛塵留連徂暑中觀望歷數旬河山險
以固士卒勇且仁飾裝去未歸相追越城闈貴無青玉
案緘佩永不泯

復登大厯進士第嘗爲水部外郎爲石洪父平墓銘

朱彬

丹陽作云暫入新豐市猶聞舊酒香抱琴沽一醉盡日
卧垂陽

彬大厯貞元間詩人

戴叔倫

字幼公潤州人師事蕭穎士爲門人冠劉晏管鹽鐵表
主管湖南至雲安楊惠琳反馳客劫之曰歸我金幣可
緩死叔倫曰身可殺財不可得乃捨之累遷至容管經

略德宗嘗賦中和節詩遣使者寵賜代還卒早行寄朱
山人放云山曉旅人去天高秋風悲明河山上沒芳草
露中衰此別又萬里少年能幾時心知剡溪路聊且寄
前期

和汴州李相公勉人日喜春云年來日日春光好今日
風光好更新獨獻菜羹憐應節遍傳金勝喜逢人煙添
柳色看猶淺鳥踏梅花落已頻東閣此時聞一曲翻令
和者不勝春

高仲武云叔倫爲人溫雅善舉止無賢不肖見皆盡心
在租庸幕數年夕惕靡怠吏部尚書劉公與祠部員外
張繼書云博訪選材揖對賓客如戴叔倫其見推稱如
此詩體雖不中越格然解宇經山火公田沒海潮亦指
事造形之工者其骨氣稍輕故詩亦少

吳明府自遠來留宿云出門逢故友衣服滿塵埃歲月
不可問山川何處來倚城容弊宅散職寄靈臺自此留
君醉相懽得幾迴

除夜宿石頭驛云旅館誰相問寒燈獨可親一年將盡
夜萬里未歸人寥落悲前事支離笑此身愁顏與衰鬢
明日去逢春

客舍與故人偶集云天秋月又滿城闕夜千重還作江
南會翻疑夢裏逢風枝驚暗鵲露草覆寒蛩羈旅長堪
醉相留畏曉鐘

送友人東歸云萬里楊柳色出關逢故人輕煙拂流水
落日照行塵積夢江湖闊憶家兄弟貧徘徊灞亭上不

語自傷春

姚合取爲
極元集

送謝夷甫宰鄖縣云君去方爲縣干戈尚未銷邑中殘
老小亂後少官僚解宇經山火公田沒海潮致時應變
俗新政滿餘姚

于鵠

鵠野田行云日沒出古城野田何茫茫寒狐上孤塚獵
火燒白楊昔人未爲泉下客若到此中還斷腸

題鄰居云僻巷鄰家少茅簷喜並居蒸梨常共竈澆蕪

亦同渠傳屐朝尋藥分燈夜讀書雖然在 cities 還得似
樵漁

寄盧儼員外秋衣詞云寄遠空以心心誠亦難知篋中
有秋帛裁作遠客衣縫製雖女工尺度手自持容貌當
目中長短不復疑針線密且堅遊客作塵縑意欲都無
言澣濯耐歲時殷勤託行人傳語慎勿遺別來年已老
亦聞鬢成絲縱然更相逢握手唯是悲所寄莫復棄願
見長相思

買山吟云買得幽山入漢陽
槿籬疎處種枕榔
唯有獼猴來往熟
弄人拋果滿書堂

山中寄樊尚書云却憶東溪日
同袍事魯儒
僧房閑共宿
酒肆醉相扶
江上雙旌貴
山中病客孤
無媒還有計
春谷種桑榆

鵠大厯貞元間詩人也為諸府從事居江湖間有卜居漢陽及荆南陪樊尚書賞花詩其自述曰三十無名客空山獨卧秋豈以詩窮者耶老大看花猶未足沿江正

遇一枝紅日斜人散東風急吹向誰家明月中

襄陽席上作

送死多於生幾人得終老句右張爲取主客圖

張籍傷鵠詩云野性踈時俗再命乃從軍氣高終不合
去如鏡上塵

鵠送客遊邊云若到并州北誰人不憶家寒深無去伴
路盡有平沙磧冷唯逢鴈天春不見花莫隨邊將意垂
老事輕車

江南曲云偶向江邊採白蘋還隨女伴賽江神衆中不

敢分明語暗擲金錢卜遠人

韋莊取爲
又玄集

張籍贈王建云于君去後交遊少東野無來箇箇貧
賴有白頭王建在眼前猶是詠詩人

王季文

季文字宗素池陽人少厭名利居九華遇異人授九仙
飛化之術曰子當先決科於詞籍後策名於真列冥注
使然不可移也登咸通中進士第授秘書郎尋謝病歸
九華日一浴於山之龍潭寒暑不渝季文九華山謠云

九華崢嶸占南陸蓮花擢本山半腹翠屏橫截萬里天
瀑水落深千丈玉雲梯石磴入杳冥俯看四極如中庭
丹崖壓下廬霍勢白日隱出牛斗星杉松一歲抽數尺
瓊草寅緣秀層壁南風拂曉煙霧開滿山葱蒨鋪鮮碧
雷霆往往從地發龍卧豹藏安可別峻極遙看曼昊蒼
挺生豈得無才傑神仙憚險莫敢登馭風駕鶴循邛陵
陽烏不見峰頂樹大火尚結岳中冰靈光爽氣曛復旭
晴天倒影西江淥具區彭蠡夾兩傍正可別作一嶽當

少陽

欽定四庫全書

唐詩紀事

十七

唐詩紀事卷二十九

欽定四庫全書

唐詩紀事卷三十

宋計敏夫撰

李益

杜羔

諸葛覺

韋執中

耿漳

盧綸

韓翃

錢起

司空曙

苗發

崔峒

李端

冷朝陽

李益

益姑臧人字君虞大歷四年登第其受降城聞笛詩教

坊樂人取為聲樂度曲又有寫征人歌早行詩為圖畫者回樂峯前沙似雪之詩是也益有心疾不見用及為幽州劉濟營田副使獻詩有感恩知有地不上望京樓之句左遷右庶子年且老門人趙宗儒自宰相罷免年七十餘益曰此吾為東府所選進士也聞者憐益之困後遷禮部尚書致仕卒

益錄其從軍詩贈左補闕盧景亮自序云吾自兵間故為文多軍旅之思或軍中酒酣塞上兵寢投劍秉筆散

懷於斯文率皆出乎慷慨意氣武毅果厲本其涼國則
世將之後乃西州之遺民歟亦其坎軻當世發憤之所

致也

其詩皆建中
貞元間作

夜上受降城聞笛詩云回樂烽前沙似雪受降城下月

如霜不知何處吹蘆管一夜征人盡望鄉

烽烽火
臺也

征人歌云邊風凍合鵬鷄泉牧馬千羣逐暖川塞外征
行無盡日年年移帳雪中天

曉角詩云邊霜一夜落平蕪吹角當城片月孤無數塞

鴻飛不度秋風卷入小單于

從軍北征云天山雪後海風寒橫笛偏吹行路難磧裏
征人三十萬一時迴向月明看

獻劉濟云草綠古燕州鶯聲引獨遊鴈歸天北畔春盡
海西頭向日花偏落馳年水自流感恩知有地不上望

京樓

從軍有苦樂行

時從司空冀
公北征作

云勞者且莫歌我欲歌送

觴行軍有苦樂此曲樂未央僕居在隴上隴水斷人腸

東過秦宮路宮樹入咸陽時逢漢帝出諫獵至長楊詎
馳遊俠窟非結少年場一旦承嘉惠輕身重恩光秉筆
參帷帟從軍至朔方邊馬多陰風草木自淒涼斷絕西
海去出沒胡沙長參差引鴈翼隱鱗騰軍裝劍文夜如
水馬汗凍成霜使氣五都少矜功六郡良山河起目前
睚眦死路傍北逐馳種虜西臨復舊疆昔還賦餘資今
出乃羸糧一矢殲夏服我弓不再張寄言丈夫雄苦樂

身自當

馳一作馳

來從竇車騎云

自朔方
行作

東髮逢世屯懷恩抱明義讀書

良不武學劍慙非智遂別魯諸生來從竇車騎追兵赴
邊急絡馬黃金轡出入燕南陸由來重意氣自經臯蘭
戰入破樓煩地西北護三邊東南留一尉時過如雲雨
參差不自意將軍失恩澤萬事從此異置酒高臺上薄
暮秋風至長戟與我歸歸來同棄置自酌還自飲非名
又非利歌出易水寒琴下雍門淚出逢平樂舊言在天
階侍問我從軍苦自陳少年貴丈夫交四海徒論身自

致漢將不封侯，蘓卿還遠使。今我終此曲，此曲誠不易。
貴人難識心，何由知忌諱。

夜發軍中云：邊馬櫪上驚，雄劍匣中鳴。半夜軍書至，匈奴寇六城中。堅分暗陣太乙起，神兵出沒風雲合。蒼皇豺虎爭，今日邊庭戰。緣賞不緣名。

五城道中云：金鏡隨玉節，落日河邊路。沙鳴後騎來，鴈起前軍度。五城鳴斥堠，三秦新召募。天寒白登道，寒濁陰山霧。仍聞舊兵老，尚在烏蘭戍。笳蕭漢思繁，旌旗旗邊。

色故寢興倦弓甲勤役傷風露來遠賞不行鋒交勲乃
茂未知朔方道何年罷兵賦

塞下曲云蕃門部落能結束朝朝馳獵河南曲

一作朝
馳暮獵

真河
曲

燕歌未斷塞鴻飛牧馬羣嘶邊草綠秦築長城城

已摧漢武北上單于臺古來征戰虜不盡至今還復天
兵來黃河東流流九折沙場埋恨何時絕蔡琰沒去造
胡笳蘇武歸來持漢節為報如今都護雄匈奴且莫下
雲中請書塞北陰山石願比燕然車騎功

大歷十才子唐書不見人數盧綸錢起郎士元司空曙
李端李益苗發皇甫曾耿漳李嘉祐又云吉頊夏侯審
亦是或云錢起盧綸司空曙皇甫曾李嘉祐吉中孚苗
發郎士元李益耿漳李端二李皆出於姑臧庶子為文
章李益尚書為門戶李益一日赴嘉會尚書曰今日兩
箇坐頭皆是李益

紅樓下聯句云佛刹接重城紅樓切太清紫雲連照灼

丹檻望崢嶸廣宣棖棟烟虹入軒窻日月平參差五陵晚

分背八川明

李益

絃韻風初過
蓮枝浪欲傾
敬瞻疑涌見

圍繞學無生

杜羔

蘭陵僻居聯句云
潘岳閑居賦
陶潛獨酌謠
二賢成往

事三徑是今朝

廣宣

生幸逢唐運
昌時奉帝堯
進思諧啟

沃退即混漁樵

李益

蠹簡封延閣
彫欄闕上霄
相從達曠

地秋露浥蘭苔

杜羔

天津橋南山中各題一句云
野坐分苔石

李益

山行遶菊

叢

韋執中

雲衣惹不破

諸葛覺

秋色望來空

閑庭草色能留馬當路揚花不避人
句笳簫漢恩繁旌旗邊色故
句馬汗凍成霜句右張為取為主
客圖以益為清竒雅正主

耿漳

元日早朝云九陌朝臣滿三朝候鼓賒
遠珂時接韻攢炬偶成花紫貝為高
闕黃龍建大牙參差萬戟合左右
八貂斜羽扇紛朱檻金爐隔翠華
微風傳曙漏曉日上春霞環珮聲
重疊蠻夷服等差樂和天易感山
固壽無

涯渥澤千年聖車書四海家盛明多在位誰得守蓬麻
贈苗員外云為郎日賦詩小謝少年時業繼儒門後心
多道者期曉迴長樂殿新出永明祠行樂西園暮春風
動柳絲

許州書情寄韓張二舍人云謫宦軍城老更悲近來頻
夢到丹墀乍燃乍滅心中火漸鐫漸多鬢上絲繞院綠
苔聞鴈處滿庭黃葉閉門時故人高步雲衢上肯念前
程杳未期

贈嚴維云許詢清論重寂寞住山陰野客棲寒寺閑門
當古林海田秋熟早湖水夜漁深世上窮通理誰能奈
此心

贈朗公云來自西天竺持經奉紫微年深梵語變行苦
俗人歸月上安禪久苔生出院稀梁間有馴鴿不去為
無機

早朝云鐘鼓餘聲裏千官向紫微冒寒人語少乘月燭
來稀清漏聞馳道紅霞映鏢闌猶看嘶馬處未啟掖垣

扉

秋日云返照入閭巷憂來與誰語古道無人行秋風動
禾黍

書情逢故人云因君知此事流恨已忘機客久多人識
年高衆病歸連雲潮色遠度雪鴈聲稀又說家林盡悽
傷淚滿衣

沙上鴈云衡陽多道里弱羽復哀音還塞知何日驚弦
亂此心夜陰前侶遠秋冷後湖深獨立沙汀意寧知霜

霰侵

贈張將軍云寥落邊城暮重門返照間鼓鼙驚雨暗士
馬過秋閑慣守臨邊郡曾營近海山關西舊業在夜夜
夢中還

酌暢當云同遊漆沮後已是十年餘幾度曾相夢何時
定得書月高城影盡霜重柳條疎且對樽中酒千般想

未如

書情逢故人以下四篇姚合取為極元集

滄寶應元年進士為左拾遺詩有家貧童僕慢官罷友

朋疎世多傳之

盧綸

綸字允言河中人大歷進士與吉中孚韓翃錢起司空
曙苗發崔峒夏侯審李端皆能詩號大歷十才子春日
登樓云花正濃時人正愁逢花却欲替花羞年來笑伴
皆歸去今日清明獨上樓

長安春望云東風吹雨過青山却望千門草色閑家在
夢中何日到春歸江上幾人還川原繚繞浮雲外宮闕

參差落照間誰念為儒多失意獨將衰鬢客秦關

貞元中吉中字為翰林學士薦綸于朝會丁家艱而中
字卒大歷中李端錢起韓翃輩能為五言詩詞情健麗
綸作尤工至貞元末錢李諸公凋落綸為懷舊詩五十
韻叙其事曰吾與吉侍郎中孚司空郎中曙苗員外發
崔補闕峒耿拾遺諱李校書端風塵追遊向三十載數
公皆負當時盛稱榮耀未幾俱沉泉下傷悼之際常暢
博士追感前事賦詩五十韻見寄輒有所酬以申悲舊

兼寄夏侯審侍郎其歷言諸子云侍郎文章宗傑出淮
楚靈掌賦若吹籟司言如建瓴郎中善餘慶雅韻與琴
清鬱鬱松帶雪蕭蕭鴻入冥員外真貴懦弱冠被華纓
月香飄桂實乳溜澀瓊英補闕思冲融巾拂藝亦精彩
蝶戲芳圃瑞雲滋翠屏拾遺興難侔逸調曠無程九醞
貯彌潔三花寒轉馨校書才智雄舉世一娉婷賭墅鬼
神變屬辭鸞鳳驚差肩曳長裾總轡奉和鈴共賦瑤臺
雪同觀金谷笙倚天方比劍沉水忽如瓶君持玉盤珠

寫我懷袖盈讀罷涕交頤願言躋百齡綸之才思皆此類也

綸德宗時為戶部郎中舅韋渠牟表其才名見禁中帝有所作輒賡和異日問渠牟盧綸李益何在答曰綸從渾瑊在河中驛召之會卒文宗尤愛其詩問宰相綸文章幾何亦有子否李德裕對綸四子皆擢進士第在臺閣帝遣中人悉索家笥得詩五百篇以聞

綸春詞云北苑羅裙帶塵衢錦綉鞋醉眠芳樹下半被

落花埋

得嶺南故人書云瘴海寄雙魚中宵達我居兩行燈下
淚一紙嶺南書地說炎蒸極人稱老病餘慙懃祝賈誼
莫共酒盃疎

題興善寺後池云隔牕棲白鶴似與鏡湖鄰月照何年
樹花逢幾番人岼沙青有路苔逕綠無塵願得容依止
僧中老此身

山下古木云高林已蕭索夜雨復秋風墜葉鳴荒竹斜

根擁斷蓬半侵山影裏長在水聲中此地何人到雲門
去亦通

送李端云故闕衰草遍離別自堪悲路出寒雲外人歸
暮雪時少孤為客慣多難識君遲掩淚空相向風塵何

所期

寄嶺南故人以下四篇姚合取為極元集

膺月觀咸寧王部曲娑勒擒豹歌云山頭曛曛日將出
山下獵圍照初日前林有獸未識名將軍促騎無人聲
潛形踈伏草不動雙鷗旋轉羣鷗鳴陰方質子纔三十

譯語受詞蕃語揖捨鞍解甲疾如風人忽虎蹲獸人立

欵然扼顙批其頤爪牙委地涎淋漓既蘇復吼拗

於教切

仍怒果叶英謀生致之拖自深叢目如雷萬夫尖容千
馬戰傳呼拜賀聲相連殺氣騰陵陰滿川始知縛虎如
縛鼠敗虜降羗在眼前祝爾嘉詞身無苦獻看將隨犀
象舞苑中流水禁中山期爾攫搏開天顏非熊之兆慶
無極願紀雄名傳百蠻

送張侍郎還蜀歌云秦家御史漢家郎親傳兩印征殊

方功成走馬朝天子伏檻談邊若流水曉離仙署趨紫
微夜接高儒讀青史瀘南五將望君還願以天書示百
蠻曲棧重江初過雨前旌後騎不同山迎車拜舞多者
老舊卒新營遍青草塞口雲生火候遲烟中鶴唳軍行
早黃花川下水交橫遠映孤霞蜀國晴筇竹筍長椒瘴
起荔支花發杜鵑鳴回首岷峩半天黑傳觴接膝何由
得空令豪士仰威名無復貧交恃顏色垂楊不動雨紛
紛錦帳胡瓶爭送君須臾醉起簫笳發空見紅旌入白

雲

韓翃

字君平南陽人命以駕部郎中知制誥時有兩韓翃德宗曰與詩人韓翃終中書舍人

翃別韋兵曹歸池州云南陵八月天暮色遠峰前楚竹青陽路吳江赤馬船籬金上客貴佩玉主人賢終日應相逐西歸定幾年

侯希逸鎮青淄翃為從事罷府閑居十年李勉鎮夷門

辟為幕屬時已遲暮不得意多家居一日夜將半客叩門急賀曰員外除駕部郎中知制誥相愕然曰誤矣客曰邸報制誥闕人中書兩進名不從又請之曰與韓翃時有同姓名者為江淮刺史又具二人同進御批曰春城無處不開花寒食東風御柳斜日暮漢宮傳蠟燭青煙散入五侯家又批曰與此韓翃客曰此員外詩耶翃曰是也是不誤矣時建中初也

奉送王相公縉赴幽州巡邊云黃閣開帷幄丹墀侍冕

旒位高湯左相權揔漢諸侯不改周南化仍分趙北憂
雙旌過易水千騎入幽州塞草連天暮邊風動地秋無
因隨遠道結束佩吳鉤

南部新書云昇平公主宅即席李端擅場送王相之幽
鎮胡擅場送劉相巡江淮錢起擅場

德宗西幸有神智驄如意騶二馬謂之功臣一日有進
瑞鞭者上曰朕有二駿今得此可為三絕因吟胡觀調
馬詩云駕騫赭白齒新齊晚日花開放碧蹄玉勒乍迴

初噴沫金鞭欲下不成嘶高仲武云韓員外意放經史
興致繁富一篇一詠朝野珍之多士之選也至如星河
秋一鴈砧杵夜千家又客衣筒布細山舍荔枝繁又疎
簾看雪卷深戶映花關方之前載則芙蓉出水未足多
也其比興深於劉員外筋節減於皇甫冉也

少年行云千點爛鳩噴玉驄青絲結尾繡纏踪鳴鞭曉
出銅臺路葉葉春衣楊柳風

羽林云駿馬牽來御柳中鳴鞭欲向渭橋東紅蹄亂踏

卷三十
青城雪花領驕嘶上苑風

題薦福衡岳禪師房云春城乞食還高論此中閑僧臘
堦前樹禪心江上山疎簾看雪捲深戶映花關晚送門
人去鐘聲杳靄間

送孫革及第東歸云過淮芳草歇千里又東歸野水吳
山出家林越鳥飛荷香隨去棹梅雨點行衣無數滄洲

客如君達者稀

少年行以下四章
姚合取為極元集

送故人歸魯云魯客多歸興居人愴別情雨餘衫袖冷

風急馬蹄輕秋草靈光殿寒雲曲阜城知君拜親後少

婦下機迎

韋莊又元集

世傳翊有寵姬柳氏翊成名從辟淄青置之都下數歲
寄詩曰章臺柳顏色青青今在否縱使長條似舊垂也
應攀折他人手柳荅曰楊柳枝芳菲節可恨年年贈離
別一葉隨風忽報秋縱使君來豈堪折後果為蕃將沙
吒利所劫翊會入中書道逢之謂永訣矣是日臨淄大
校置酒疑翊不樂具告之有虞侯將許俊以義烈自許

即詐取得之以授韓希逸聞之曰似我往日所為也後復能之翊後為夷門幕府後生共目為惡詩輕之

李義山有韓翊舍人即事云萱草含丹粉荷花抱綠房鳥應悲蜀帝蟬是怨齊王通內歲珠府應官解玉坊橋南荀令過十里送花香

錢起

起吳興人天寶進士與郎士元齊名時語曰前有沈宋後有錢郎終考功郎中

天寶十年試湘靈鼓瑟詩云善鼓雲和瑟常聞帝子靈
馮夷徒自舞楚客不堪聽苦調淒金石清音入杳冥蒼
梧來怨慕白芷動芳馨流水傳湘浦悲風過洞庭曲終
人不見江上數峰青起從鄉薦居江湖客舍聞吟於庭
中曰曲終人不見江上數峰青視之無所見矣明年崔
暉試湘靈鼓瑟詩起即用為末句人以為鬼謠

奉送劉相公催運云國用資戎事臣勞為主憂將徵任
土貢更發濟川舟擁傳星還去過池鳳不留唯高飲水

節稍淺別家愁落葉淮邊雨孤山海上秋遙知謝公興
微月上江樓時以此詩為擅場

高仲武云詩格清竒理致清澹粵從登第挺冠詞林文
宗右丞許以高格右丞沒後負外為雄投齊宋之浮游
削梁陳之靡嫚迥然獨立莫之與京且如鳥道掛踈雨
人家殘夕陽又牛羊山上小煙火隔林深又長樂鐘聲
花外盡龍池柳色雨中深皆特出意表標準古今又窮
達應明主耕桑亦近郊則禮義克全忠孝兼著足以引

長名流為後楷式

送僧歸日東云上國隨緣去東途若夢行浮雲滄海遠
去世法舟輕水月通禪觀魚龍聽梵聲唯憐慧燈影萬
里眼中明

送僧自吳遊蜀云隨緣忽西去何日返東林世路無期
別空門不住心人煙一鉢少山雪獨行深天外猿聲夜
誰聞清梵音

送張管書記云邊事多勞役儒衣逐鼓鼙日寒關樹外

峰盡塞雲西河廣蓬難度天遙鴈漸低班超封定遠之
子去思齊

送征鴈云秋空萬里靜嘹唳獨南征風急翻霜冷雲開
見月驚塞長憐去翼影滅有餘聲悵望遙天外鄉愁滿
目生

寄郎士元云龍節知無事江城不掩扉詩傳過客遠書
別故人稀坐嘯看潮起行春送鴈歸望舒三五夜思盡
謝玄暉

宿洞口館云野竹通溪冷秋蟬入戶鳴亂來人不到寒
草上堦生

裴迪書齋望月云夜來詩酒意月上謝公樓影閉重關
靜寒生獨樹秋鵲驚隨葉散螢遠入煙流今夕遙天末
清暉幾處愁

送彈琴李長史赴洪州云抱琴為傲史孤棹復南行幾
度秋江水皆添白雪聲佳期來客夢幽興緩王程佐牧

無勞問心平政自平

寄郎士元以下四章
姚合取為極元集

起還藍田王維贈別云草色日向好桃源人去掃手持
平子賦目送老萊衣每候山櫻發時同海燕歸今年寒
食酒應得返柴扉起答詩云卑栖却得性每與白雲歸
徇祿仍懷橘看山免採薇

一作別山只昨日春露已露
衣採薇頻盈夢看花空厭歸

暮禽先去馬新月待開扉霄漢時迴首知音青瑣闈

王維春夜竹亭贈起歸藍田詩云夜靜羣動息時聞隔
林犬却憶山中時人家澗西遠羨君明發去采蕨輕軒
冕

起答云山月隨客來主人興不淺今宵竹林下誰覺花
源遠惆悵曉鶯啼孤雲還絕巖

贈闕下裴舍人云二月黃鶯飛上林春城紫禁曉陰陰
長樂鐘聲花外盡龍池柳色雨中深陽和不散窮途恨
霄漢長懷捧日心獻賦十年猶未遇羞將白髮對華簪
東臯早春寄郎校書云祿微賴學稼歲起歸衡茅窮達
戀明主耕桑亦近郊夜來霽山雪陽氣動林梢萌蕙暖
初吐春鳩鳴欲巢蓬萊時入夢知子憶平交

題玉山村叟壁云谷口好泉石居人能陸沉牛羊上山
小煙火隔雲深一徑入溪色數家連竹陰藏虹辭晚雨
驚隼落殘禽涉趣皆流目將歸必在林却思黃綬事辜
負紫芝心

逃暑太子李舍人別業云下馬失炎暑重門深綠篁宮
臣禮嘉客林表開蘭堂茲夕興難盡澄壘照墨塲東陵
晚來好目極趣何長鳥路掛疎雨人家殘夕陽城隅擁
歸騎留醉戀羣芳

和張僕射塞下曲云月黑鴈飛高單于夜遁逃欲將輕
騎逐大雪滿弓刀

司空曙

和耿拾遺元日早朝云元朔爭朝闕奔流若會溟路塵
和薄霧騎火接低星漏促雙魚鑰車喧百子鈴冕旒當
翠殿幢戟滿彤庭表歲方編瑞乘春即宥刑諸侯陳禹
玉司歷獻堯蓂壽酒三觴退簫韶九奏停太陽開物象
沛澤及生靈南陌祥光紫東方曉氣青白憐楊子賤歸

草太元經

立秋日云律變新秋至蕭條自此初花酣蓮報謝葉在
柳呈疎淡月多雲映清風似雨餘捲簾涼暗度却扇暑
先除草靜多翻燕波澄乍露魚今朝散騎省作賦興何
如

酬張芬有赦後見贈云紫鳳朝銜五色書陽春忽報網
羅除已將心變寒灰後豈料先生腐草餘建水風煙收
客淚杜陵花竹夢郊居勞君故有詩相贈欲報瓊瑤恨

不如

晦日益州北池陪宴云臨泛從公曰仙舟翠幕張七橋
通碧澗雙樹接花塘玉燭收寒氣金波隱夕光野聞歌
管思水靜綺羅香遊騎紫林遠飛橈截岸長郊原懷瀨
漉波漾寫江潢常侍傳花詔偏裨問羽觴豈令南峴首
千載播餘芳

曙字文初廣平人登進士第從韋臯於劍南貞元中為
水部郎中終虞部

耿滯就宿因傷故人云舊時聞笛淚此夜重霑衣方恨
同懷少那堪相見稀竹煙疑澗壑林雪似芳菲多謝勞
車馬應憐獨掩扉

經廢寶光寺云黃葉前朝寺無僧寒殿開池晴龜出曝
松暝鶴飛回古砌碑橫草陰廊畫雜苔禪宮亦銷歇塵
世轉堪哀

春日野望寄錢起員外云草長花落樹羸病強尋春無
復少年意空餘華髮新青原晴見水白社靜逢人寄謝

南宮客軒車不見親

喜外弟盧綸見宿云靜夜四無隣
荒居舊業貧雨中黃
葉樹燈下白頭人似我獨沉久
媿君相見頻平生自有
分況是蔡家親

送王閏云相送臨寒水蒼然望故關
江燕連夢澤楚雪
入商山話我他年舊看君此日閑
因將自悲淚一灑別
離顏

新蟬云今朝蟬忽鳴
羈客若為情漸覺
一年謝能令萬

感生微風初滿樹落日稍沉城為問同懷者淒涼聽幾聲

望水云高樓晴見水楚色靄相和野極空如練天遙不辨波永無人跡到時有鳥行過况是蒼茫外殘陽照最多

哭麴象云憶昨秋風起君曾歎逐臣何言芳草日自作

九泉人

耿就宿以下七篇姚合取為極元集

苗發

送司空曙之蘇州詩云盤門吳舊地蟬盡早秋時歸國
人皆久移家君獨遲廣陵經水宿建鄴有僧期若到西
霞寺應看江揔碑

送孫德諭罷官往黔州

孫父曾牧此州因寄家也

云中歲分符典石

城兩朝趨陞謁承明闕下昨陳歸老疏天南今切去鄉
情親知握手三秋別几杖扶身萬里行伯道暮年無嗣
子欲將家事託門生

發晉卿子終都官員外郎

崔峒

寄上禮部李侍郎云吳楚相逢處江湖共泛時
任風舟去遠待月酒行遲白髮常同歎青雲本異期
貴來君却少愁去我先悲玉佩明朝盛蒼苔
晒巷滋追尋恨無路唯有夢相思

江上書懷云骨肉天涯別江山日落時
淚流襟上血髮白鏡中絲胡越書難到存亡夢
豈知登高迴首罷形影自相隨

喜逢妻弟鄭損因送入京詩云亂後自江城相逢喜復
驚為經多載別欲問小時名對酒悲前事論文畏後生
遙知盈卷軸紙貴在江城

詠門上畫小松上元王杜三相公云昔聞生澗底今見
起毫端衆草此時没人知歲寒豈能禪棟宇且貴出
門闌只在丹青意凌雲也不難

題崇福寺禪師院云僧家竟何事掃地與焚香清磬度
山翠閑雲來竹房身心塵外遠歲月坐中長向晚禪堂

卷三十一
卷三十
閑無人空夕陽

峒有初入集賢院贈李獻任詩峒與李初同官於常山
又有拜拾遺酬邱二十二見贈詩云江海久垂綸朝衣
忽掛身丹墀方謁帝白髮免羞人才愧文章士名當諫
諍臣空餘薦賢分不敢負交親

巖維送峒使往睦州云如今相府用英髦獨往南州肯
告勞水水近開漁浦出雪雲初卷定山高木蘭花映桐
廬縣青雀舟隨白鷺濤使者應須訪庶吏府中唯有范

功曹

高仲武云峒詩文彩炳發意思雅淡如清磬度山翠閑
雲來竹房又流水聲中視公事寒山影裏見人家此亦
披沙鍊金時時見寶也

峒登進士第為拾遺入集賢為學士後終州刺史或云
終元武令文藝傳云終右補闕峒寄李明府云松堂寂
寂對煙霞五柳門前集晚鷓流水聲中視公事寒山影
裏見人家觀風共美新為政計日還應更觸邪可惜陶

潛無限酒不逢籬菊正開花

李端

古別離詩云水國葉黃時洞庭霜落夜行舟問商賈宿
在楓林下此地送君還茫茫似夢間後期知幾日前路
轉多山巫峽通湘浦迢迢隔雲雨天晴見海檣月落聞
津鼓人老自多愁水深難急流清宵歌一曲白首對汀

洲

贈郭駙馬詩云

郭令公子峻高昇平
公主此詩席上成

青春都尉最風流

二十功成便拜侯，金距鬪鷄過上苑。
玉鞭驅馬出長楸，薰香荀令偏憐小。
傅粉何郎不解愁，日暮吹簫楊柳陌。
路人遙指鳳凰樓。

又云方塘似鏡草芊芊，初月如鉤未上弦。
新開金埒看調馬，舊賜銅山許鑄錢。
楊柳入樓吹玉笛，芙蓉出水妬花鈿。
今朝都尉如相顧，願脫長裾學少年。

端趙州人始郭曖尚昇平，公主賢明有才思。
尤多招士端等多，從曖遊曖進官大。
集客端賦詩最工，錢起曰素

為之請賦起姓又工於前客乃服

端賦巫山高云巫山十二峰皆在碧虛中回合雲藏日
霏微雨帶風猿聲寒過水樹色暮連空愁向高唐望清
秋見楚宮

蜀路有飛泉亭中詩板百餘篇後薛能佐李福於蜀道
過此題云賈椽曾空去題詩豈易哉悉去諸板唯留端
巫山高一篇而已

贈苗發員外云朱戶敞高扉青槐凝落暉八龍承慶重

二虎遮朝歸坐竹人聲絕橫琴鳥語稀
花慚潘岳貌年稱老菜衣葉暗新櫻熟
絲長粉蝶飛應憐魯儒賤空與故山違

茂陵山行陪韋金部云宿雨朝來歇空山
天氣清盤雲雙鶴下隔水一蟬鳴古道
黃花落平蕪赤燒生茂陵雖有病猶得
伴君行

雲際中峰云自得中峰住深林亦閉關
經秋無客到入夜有僧還暗澗泉聲小
荒崗樹影閑高亭不可望星月

滿空山

蕪城懷古云風吹城上樹草沒城邊路城裏月明時精

靈自來去

贈苗發以下四篇
姚合取為極元集

冷朝陽

登靈善寺塔云飛閣青霞裏先秋獨早涼天花映窻近
月桂拂簷香華岳三峰小黃河一帶長空聞指歸路煙
處有垂楊

中秋與空上人同宿華嚴寺云掃榻相逢宿論詩舊梵


宮鐘聲迎鼓盡月色過山窮庭簇安禪草牕飛帶火蟲
一宵何惜別迴首隔秋風

立春詩云玉律傳佳節青陽應北辰土牛呈歲稔綵燕
表年春鴈盡星迴次寒餘月建寅風光何處好雲物望
中新流水初銷凍潛魚欲振鱗梅花將柳色偏思越鄉
人

潞州節度薛嵩有青衣善彈阮咸琴手紋隱起如紅線
因以名之一日辭去朝陽為詞曰採菱歌怨木蘭舟送

客魂銷百尺樓還似洛妃乘霧去碧天無際水東流
李嘉祐送朝陽登第歸江寧云高第猶佳句諸生似者
稀長安帶酒別建業候潮歸稚子歡迎棹鄰人為掃扉
含情過舊浦鷗鳥亦依依

朝陽登大歷進士第為薛嵩從事錢起送朝陽擢第後
歸金陵覲省詩云萊子晝歸今始好潘園景色夏偏濃
夕陽流水吟詩去明月青山出竹逢兄弟相親初讓果
鄉人爭賀舊登龍佳期少別俄千里雲樹愁看過幾重



唐詩紀事卷三十

欽定四庫全書

集部

唐詩紀事卷三十一至三十三

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄貢生臣李璜

謄錄監生臣劉紳

欽定四庫全書

唐詩紀事卷三十一

宋 計敏夫 撰

竇叔向

竇常

竇牟

竇羣

竇庠

竇鞏

常建

李約

柳中庸

郭鄴

韋處厚

權德輿

張薦

楊於陵

許孟容

崔邠

馮伉

潘孟陽

武少儀

鄭常

鄭轅

韓濬

王濯

張莒

張叔良

竇叔向

五子常牟羣庠鞏

叔向字遺直京兆人代宗時常袞為相用為左拾遺內供奉及貶亦出為溧水令四子登第羣以處士隱毗陵韋夏卿薦之朝德宗擢為左拾遺代武元衡為中丞薦呂溫羊士諤為御史李吉甫以二人躁險持不下羣怨吉甫伺吉甫陰事幾為憲宗所誅羣與兄常牟弟庠鞏皆為郎工詞章為聯珠集行於時義取昆弟若五星然

常字中行登第隱居二十年終國子祭酒

牟字貽周終國子司業

庠字胄卿終婺州刺史

鞏字友封元稹節度武昌辟為御史中丞充副使雅裕
有名于時平居與人言若不出口世號躡嚅翁卒於武
昌

叔向寒食賜恩火云恩光及小臣華燭忽驚春電影隨
中使星輝拂路人幸因榆柳暖一照草茅貧

端午日恩賜百索云仙宮長命縷端午降殊私事盛蛟
龍見恩深犬馬知餘生儻可續終冀答明時

酬李袁州嘉祐云少年輕會復輕離老大關心揔是悲
強說前程聊自慰未知攜手定何時公才屈指登黃閣
匪服胡顏上赤墀想到長安誦佳句滿朝誰不念瓊枝
蓋嘉祐以詩送叔向并寄其弟紆云自歎未霑黃紙詔
那堪遠送赤墀人老為僑客偏相戀素是詩家倍益親
妻兒共載無羈思駕鷺同行不負身憑爾將書通令弟

惟論華髮愧頭巾故叔向詩有瓊枝之句

竇常

常任武陵寒食日次松滋渡先寄劉員外云杏花榆莢
曉風前雲際離離上峽船江轉數程淹驛騎楚曾三戶
少人煙看春又遇清明節算老重經癸巳年幸得住山
當郡舍在朝常詠卜居篇

常初登第桑道茂云二十年後出官後五度奏官勅皆
不下即攝職久之至大曆十四年及第即二十年矣

北固晚眺云小園芒種後梅天風雨涼露蠶開晚簇江
燕遶危檣山趾北來固潮頭西去長年年此登眺人事
幾銷亡

途中立春寄楊卯伯云浪迹終年客驚心此地春風前
猶去馬澤畔耦耕人老大交情重悲涼外物親子雲今
在宅應見柳條新

七夕寄懷云露盤花水望三星鬢髻虛無降匹靈斜漢
沒時人不寐幾條蛛網下風庭

寶年

元日喜聞大禮寄四學士六舍人云有事郊壇畢無私日
月臨歲華春更早天瑞雪猶深玉輦回時令金門降德音
翰飛駕別侶叢植桂為林粉澤資鴻筆薰和本素琴禮成
戎器下恩徹鬼方沉麟爵來稱紀官師退絕箴道風黃閣
靜祥景紫垣陰壽酒朝時獻農書夜直尋國香煨翠幄庭
燎赭紅衾漢魏文章盛堯湯雨露霑密辭投水石精義出
沙金宸宸親惟敬鈞衡近匪侵長驅千里駿清唳九霄禽

金
卷三十一
慶賜迎新服齋莊棄舊簪忽思班女怨遙聽越人吟末
路甘貧病流年苦滯淫夢中青瑣闥歸處碧山岑竊抃
聞韶獲觀光想棘任大哉寰海晏不筭子牟心

牟秋夕閑居對雨贈別盧坦云燕燕辭巢蟬蛻枝窮居
積雨壞藩籬夜長簷溜寒無寢日晏厨煙濕未炊悟主
一言那可學從軍五百竟徒為故人駿馬朝天使洛下
秋聲恐要知

竇羣

黔中書懷云萬事非京國千山擁麗譙佩刀看日曬賜
馬傍江調言語多重譯壺觴每獨謠泂流如着翅不敢
問歸橈

竇庠

陪留守韓僕射巡內至上陽宮感歎云愁煙漠漠草離
離太乙鈎陳處處疑薄暮毀垣春雨裏殘花猶發萬年
枝

竇鞏

代隣叟云年來七十罷耕桑就煖支羸強下床滿眼兒
孫身外事閑梳白髮對斜陽

永寧小園寄接近校書云故里心期奈別何手移芳樹
憶庭柯東臯黍熟君應醉梨葉初紅白露多

寄南遊弟兄云書來未報幾時還知在三湘五嶺間獨
立衡門秋水闊寒鷗飛去日啣山

自京將赴黔南云風雨荊州二月天問人初雇峽中船
西南一望雲和水猶道黔南有四千

南遊感興云傷心欲問當時事唯見江流去不迴日暮
東風春草綠鷓鴣飛上越王臺

放魚云金錢贖得免刀痕聞道禽魚亦感恩好去長江

千萬里不須辛苦上龍門

武昌時也

宮人斜云離宮路遠北原斜生死恩深不到家雲雨今
歸何處去黃鸝飛上野棠花

新營別墅寄兄云懶性如今成野人行藏由興不由身
莫驚此度歸來晚買得山居正值春

樂天與微之書云君興有餘力且與僕悉索還往詩中
取其尤長者如張十八古樂府李二十新歌行也盧楊
二秘書律詩貞與巨源竇七鞏也元八絕句博考精掇編而次
之號元白往還詩集衆君子得擬議於此者莫不踊躍
歡喜以為盛事

常建

清晨入古寺初日照高林竹徑通幽處禪房花木深山
先悅鳥性潭影空人心萬籟此都寂但餘鐘磬音題破山寺

後禪院

江上調玉琴一絃清一心泠泠七弦遍萬木澄幽陰能
使江月白又令江水深始知梧桐枝可以徽黃金

江上琴興

夢太白西峰云夢寐昇九嵯香靄逢元君遺我太白岑
寥寥辭垢氛結宇在星漢宴林閉氤氳楹覆餘翠巾
鳥生片雲時往溪谷間孤亭晝仍曛松峰引天影石瀨
清霞文恬目緩舟趣霽心投鳥羣春風又搖擢潭島花
紛紛

宿王昌齡隱居云青溪深不測隱處惟孤雲松際露微
月清光猶為君茅亭宿花影藥院滋苔紋余亦謝時去
西山鸞鶴羣

歐陽永叔云吾嘗愛建竹逕通幽處禪房花木深欲効
其語作一聯久不可得始知造意者為難工也來青州
得一山齋不意平生想見而不能道以言者乃為已有
於是益欲希其髣髴竟爾莫獲一言

丹陽殷璠撰河岳英靈集首列建詩愛其山光悅鳥性

潭影空人心

商璠云高才而無貴位誠哉是言也曩劉楨死於文學左思終於記室鮑昭卒於叅軍今常建亦淪於一尉悲夫建詩似初發通莊却尋野逕百里之外方歸大道所以其旨遠其興僻佳句輒來惟論意表至如松際露微月清光猶為君又山光悅鳥性潭影空人心此例數十句並可稱為警策一篇盡善者戰餘落日黃軍敗鼓聲死今與山鬼隣殘兵哭遼水思既邈古詞又警絕潘岳

雖云能敘悲怨未見如此章句也

昭君墓云漢宮豈不死異域猶傷沒萬里馱黃金蛾眉
為枯骨迴軍夜出塞立馬皆不發憤恨丹青人墳上哭

明月

弔王將軍墓云嫫姚北伐時深入強千里戰餘落日黃
軍敗鼓聲死常聞漢飛將可奪單于壘今與山鬼隣殘
兵哭遼水

送李十一尉臨溪云泠泠花下琴君唱渡江吟天際一

帆影預懸離別心以言神仙尉因致瑤華音迴軫撫商
調越溪澄碧林

李約

汧公勉之子也為兵部外郎與主客外郎張諗同官每
單床靜言連旦不寐故約贈韋徵君况詩曰我有心中
事不向韋三說秋夜洛陽城明月照張八

歲日感懷云曙氣變東風蟾壺夜漏窮新春幾人老舊
歷四時空身賤悲添歲家貧喜過冬稱觴唯有感歡慶

在兒童

觀祈雨云桑條無葉土生烟
簫管迎龍水廟前朱門幾
處看歌舞猶恐春陰咽管絃

過華清宮云君王遊樂萬幾輕
一曲霓裳四海兵玉輦
昇天人已盡故宮猶有樹長生

從軍行云看圖開教陣畫地靜
論邊烏壘天西戍鷹姿
塞上川路長唯筭月書遠每題年
無復生還望翻思未

別前

柵濠三面關箭盡舉烽頻營柳和煙暮關榆帶雪春邊
城多老將磧路少歸人殺盡金河卒年年漆塞塵
候火起鵬城塵沙擁戰聲游軍藏虜幟降騎說蕃情霜
落彪池淺秋深太白明嫫姚方虎視不覺說添兵

約雅度簡遠有山林之致在潤州得古鐵一片擊之清
越又養一猿名山公月夜泛江登金山鼓琴猿必嘯和
魯佐庶人李錡幕至金陵屢讚招隱寺標致一日庶人
宴寺中明日謂曰子嘗稱招隱之致昨日遊宴何殊州

中約曰某所賞者疎野耳若遠山將翠幕遮古松用綵
物裹羶腥浣鹿跑泉音樂亂山鳥聲此則實不如在叔
父大廳也性又嗜茶能自煎曰茶湏緩火炙活火煎活
火炭火有焰者曾奉使行陝州硤石縣東愛渠水清流
旬日忘發梁武造寺令蕭子雲飛白大書一蕭字約自
江淮竭產致歸洛中匣於小亭號曰蕭齋

約城南訪裴氏昆季云相思起中夜夙駕訪柴荆早霧
桑柘隱曉光溪澗明村蹊蒿棘間往往斷新耕貧野煙

火微晝無烏鳶聲田頭逢餉人道君南山行南山千里
峯盡是相思情野老無拜揖村童多髣形相呼看車馬
顏色喜相驚荒圃鷄豚樂雨牆禾莠生欲君知我來壁
上空書名

柳中庸

江行詩云繁陰乍隱洲落葉初飛浦蕭蕭客舟帆暮入
寒江雨

夜渡江云夜渚帶浮煙蒼茫晦遠天舟輕不覺動纜急

始知牽聽笛遙尋岫聞香暗識蓮唯看去帆影常恐客
心懸

李端司馬於瓜州寄中庸云懷人同不寐清夜起論文
月魄正出海鴈行斜上雲寒潮來灑灑秋葉下紛紛便
送江東去徘徊只待君

又江上別中庸云秦人江上見握手便沾衣

中庸子厚之族御史并之弟也與弟中行皆名有文咸
為官早死

段成式酉陽雜俎載中庸善易嘗詣普寂公公曰筮吾
心所在也柳曰和尚心在前簷第七題復問之在某處
寂曰萬物無逃於數也吾將逃矣嘗試測之柳久之矍
然曰至矣寂然不動吾無得而知矣

郭鄆

寒食寄李補闕云蘭陵士女滿晴川郊外紛紛拜古埏
萬井閭閻皆禁火九原松柏自生煙人間後事悲前事
鏡裏今年老去年介子終知祿不及王孫誰肯一相憐

李公垂云常州建元寺在郡東郭松扉竹院各在崗阜
每歲寒食里人洒掃經過之所大歷中詩人郭鄭賦寒
食詩當時以為絕唱嘗在兒童即聞此詩因和云江城
物候傷心地遠寺經過禁火辰芳草隴邊迴首客野花
叢裏斷腸人紫荆繁艷空門畫紅藥深開古殿春歎惜
光陰催白髮莫悲風月獨沾巾

皇甫冉送鄭詩云纔見吳洲百草春已聞燕鴈一聲新
秋風何處催年急偏逐山行水宿人

鄖大歷貞元詩人也

韋處厚

盛山十二詩韓退之序云韋侯昔以考功顯曹盛山僻
郡奪所宜處納之惡地以枉其材韋侯將怨且不釋矣
或曰不然夫得利則躍躍以喜不得利則戚戚以泣若
不可生者豈韋侯之謂哉韋侯讀六藝之文探周公孔
子之意又妙能為辭章可謂儒者夫儒者之於患難苟
非其自取之其拒而不受於懷也若築河堤以障屋雷

其容而消之也若水之於海水之於夏日其玩而忘之
以文辭也若奏金石以破蟋蟀之鳴虫飛之聲况一不
快於考功盛山一出入息之間哉未幾果有以韋侯所
為十二詩遺余者其意方且以入溪谷上巘石追逐雲
月不足日為事讀而詠歌之令人欲棄百事往而與之
游不知其出於巴東以屬胸臆也于時應而和者凡十
人及此韋侯為中書舍人侍講六經禁中和者通判元
司馬稹為宰相洋州許使君康佐為京兆忠州白使君

居易為中書舍人李使君景儉為諫議大夫黔州嚴中丞
謩為秘書少監溫司馬造為起居舍人皆集闕下於是
盛山之十二詩與其和者大行於時聯為大卷家有
之焉慕而為者將日益多則分為別卷韋侯俾予題其
首

隱月岫云初映鈎如線終銜鏡似鈎遠澄秋水色高倚
曉河流

流杯渠云激曲縈飛箭浮溝泛滿卮將來山太守早向

習家池

竹崑云不資冬日秀為作暑天寒先植誠非鳳來翔定
是鸞

繡衣石榻云

為溫侍御置

崑嶼雪中嶠磊落標方峭勿為枕

蒼山還當礎清廟

宿雲亭云雨合飛危砌天開卷曉窻齊平聯郭柳帶繞
抱城江

梅谿云夾岼凝輕素交枝漾淺淪味調方薦實臆近又

先春

桃塢云噴日舒紅景通蹊茂綠陰終期王母摘不羨武陵深

胡盧沼云疏鑿徒為巧圓窪日可澄倒花紛錯秀鑑月靜涵冰

茶嶺云顧渚吳商絕蒙山蜀信稀千叢因此始含露紫英肥

盤石磴云繚繞緣雲上璘玢甃玉聯高高曾幾折極目

秋鷲

琵琶臺云福地難層土因岷遂削成淺深嵐嶂色盡向
此中呈

上士餅泉云

為柳律
師置

綆汲豈無井顛巖貴非浚願洗塵

垢餘一雨根莖潤

權德輿

三雜詩云婉彼嬴氏女吹簫偶蕭史彩鸞駕非煙綽約
兩仙子神期諒交感相顧乃如此豈比成都人琴心中

夜起

陽臺巫山上風雨忽晴曠朝雲與遊龍變化千萬狀魂
交復目斷縹緲難比况蘭澤不可親疑情坐惆悵

淇水春正深上宮蘭葉齊光風兩搖蕩鳴珮出中閨一
顧授橫波千金呈瓠犀徒然路傍子怳怳復悽悽

侍御從舅初免職歸東山寄以詩云靡靡南軒蕙迎風
轉芬滋落落幽澗松百尺無附枝世物自多故達人心
不羈偶陳幕中畫未負林間期感恩從慰薦循性難繫

維野鶴無俗質孤雲多異姿清泠松露泣照灼巖花遲
終當稅塵駕來就東山嬉

江行四首云曉風搖五兩殘月映石壁稍稍曙光開片

帆在空碧

右曉

孤舟漾暖景獨鶴下秋空安流日正晝淨綠天無風

右晝

古樹夕陽盡空江暮靄收寂寞叩船坐獨生千里愁

右晚

猿聲到枕上愁夢紛難理寂寂深夜寒清霜落秋水

右夜

德輿字載之元和中為相其文雅正瞻縟動止無外飾

其醞藉風流自然可慕

楊嗣復序其文集曰貞元中奉詔考定賢良草澤之士
昇名七十七人及為禮部侍郎擢進士第者七十有二
鸞鳳杞梓舉集其門登輔相之位者前後十人

載之送陳秀才應舉序云陳侯工詩賦長波清瀾浩浩
不窮屯田柳郎中為予誦其佳句曰地偏雲自起日暮
山更深及獲其卷又有過於是者

不知陳氏之名今載於此

和潘孟陽迴文絕句云酒杯春醉好飛雲晚庭閑久憶

同前賞中林對遠山

張薦

德宗時薦作秘書監權載之以離合詩贈之云黃葉從
風散暗嗟時節換忽見鬢邊霜勿辭林下觴躬行君子
道身負芳名早帳殿漢官儀中車塞垣草交情劇斷金
文律每招尋始知逢山下如見古人心

薦和云移居既同里多幸陪君子宏雅重當朝弓旌早
見招植根瓊林圃直夜金闈步勸深子玉銘力競相如

賦間閣向春闈日復想光儀格言信難繼木石強為辭
薦和潘孟陽迴文絕句云遲遲日氣暖漫漫雪天春知
君欲醉飲思見此交親

薦字孝舉唐史有傳

崔郊

和權載之離合詩云脉脉羨佳期月夜吟麗詞諫垣則
隨步東觀方承顧林雪消艷陽簡冊漏華光坐更芝蘭
室千載各芬芳節苦文俱盛即時仍並命翩翩紫霄中

羽翮相輝映

字處仁時為中書舍人唐史有傳

楊於陵

和權載之離合詩云校德盡珪璋才臣時所揚放情寄
文律方茂經邦術王猷符發揮十載契心期晝遊有嘉
話書法無隱辭信茲酬和美言與芝蘭比昨來恣吟繹
日覺祛蒙鄙

時為中書舍人唐史有傳

許孟容

答權載之離合詩云史才司秘府文哲今超古亦有擅
風騷六聯文墨曹聖賢三代意工藝千金字化識從臣
謠人推仙閣吏如登崑閬時口誦靈真詞孫簡下威鳳
系霜瓊玉枝

時為給事中唐史有傳

馮伉

和權載之離合詩云車馬退朝後聿懷在文友動詞宗

伯雄重美良史功亦曾吟鮑謝二妙尤增價
雨霜鴻唳天匝樹鳥鳴夜單思客縱橫早擅
希代名息心欲焚硯自覲陪羣英

時為給事中唐史有傳

潘孟陽

和權載之離合詩云詠歌有離合求夜觀酬答
筭中操綵牋竹簡何足編意深俱妙絕心契交
情結計彼官接聯言初並清切翔集本相隨羽
儀良在斯煙雲競文藻

因喜翫新詩

春日雪以迴文絕句呈張薦權德輿云春梅雜落雪發
樹幾花開真酒盡興飲仁里願同來時未四十為戶部
侍郎唐史有傳

武少儀

和權載之離合詩云少年慕時彥小晤文多變木鐸比
羣英八方流德聲雷陳美交契雨雪音塵繼恩顧各飛
翔因詩覩瑰麗傳野絕遺賢人希有盛遷早欽風與雅

日詠贈酬篇

時為國子司業

鄭常

寄邢逸人云羨君無外事日與世情稀地僻人難別溪
深鳥自飛儒衣荷葉老野飯藥苗肥疇昔江湖意如今
憶共歸

謫居漁陽至白沙阻雨題驛云漁陽知近遠見說過潞
城雲雨經春客江山幾日程終隨鷗鳥去祇待海潮生

前路逢漁父多慙問姓名

送頭陀上人自廬山歸東溪云僧家無住着早晚出東
林行道非真相頭陀是苦心持齋山果熟倚錫野雲深
溪寺誰相待香花與梵音

高仲武云常省靜婉靡雖未洪深已入文流翻翻然有
士風故錄之

鄭轅

清明賜新火詩云改火清明候優恩賜近臣漏殘丹禁

曉燧發白榆新瑞彩來雙闕神光煥四隣氣回侯第暖
煙散帝城春利用調羹鼎餘輝燭緡紳皇明如照隱願
及聚螢人

韓大歷九年進士

韓濬

清明賜新火詩云朱騎傳紅燭天厨賜近臣火隨黃道
見煙繞白榆新榮耀分他室恩光共此辰更調金鼎膳
還暖玉堂人灼灼千門曉輝輝萬井春應憐聚螢者瞻

望獨無隣

李端送濬及第歸江東覲省詩云登龍兼折桂歸去當
高車舊楚楓猶暗前隋柳已疎月中逢漢客浪裏得鄉
書見說江邊住知君不厭魚

濬大歷九年進士

王濯

清明賜新火詩云御火傳香殿華先及侍臣星流中使
馬燭耀九衢人轉影連金屋分輝麗錦茵焰迎紅藥發

金方... 卷三十一
煙染綠條春助律和風早添爐暖氣新誰憐一寒士猶
望照東隣

濯登大歷九年進士第

張莒

元日望含元殿御扇開合詩云萬國來朝歲千秋覲聖
君輦迎仙仗出扇匝御香焚俯對朝容近先知曙色分
冕旒開處見鐘磬合時聞影動承朝日花攢似慶雲蒲
葵那可比徒用隔炎氛

柳子厚先友碑云莒長山人登大歷九年第大中時官
吏部外郎

張叔良

長至上公獻壽詩云鳳闕晴鐘動鷄人曉漏長九重
初啟鑰三事正稱觴日至龍顏近天旋聖歷昌休光連
雪淨瑞氣雜爐香化被君恩洽恩沾士庶康不因稽舊
典誰得紀朝章

叔良登廣德二年進士第

唐詩紀事卷三十一

欽定四庫全書

唐詩紀事卷三十二

宋 計敏夫 撰

崔琮

李竦

裴達

于尹躬

顏粲

葉季良

陳通方

嚴公弼

嚴公貺

王表

陸贄

楊炎

元季川

蔣煥

包何

陸海

劉商

胡笳十
八拍

崔琮

長至上公獻壽詩云應歷三陽首朝天萬國同斗邊
看子月臺上候祥風五夜鏡初曉千門日正融玉堦文
物盛仙仗武貔雄率舞皆羣辟稱觴即上公南山為聖
壽長對未央宮

琮登大歷二年進士第

李竦

長至上公獻壽詩云候曉金門闢乘時寶歷長羽儀
瞻上宰雲物麗初陽漢禮方傳佩堯年正捧觴日行臨

觀闕帝錫洽珪璋盛美超三代洪休降百祥自憐朝末
坐空此詠無疆

竦登大歷二年進士第官于京師朱泚亂竦與闕播盧
杞皆踰垣走追及帝咸陽

裴達

南至日太史登臺書雲物詩云圓丘纔展禮佳氣近初
分太史新簪筆高臺紀彩雲煙空和縹緲曉色共氤氳
道泰資賢輔年豐荷聖君恭惟司國瑞兼用察人文應

念懷鉉客終朝望碧霄

達登大歷進士第

于尹躬

南至日太史登臺書雲物詩云至日行時令登臺約禮
文官稱伯趙氏色辨五方雲晝漏聽初發陽光望漸分
司天為歲備持簡出人羣惠愛周微物生靈荷聖君常
當有嘉瑞郁郁復紛紛

尹躬大歷進士元和間為中書舍人坐其弟臯漢以贓

獲罪左授洋州刺史制云雖無從坐之法合當失教之責

顏粲

吳宮教美人戰云有客陳兵畫功成欲霸吳玉顏承將
略金鈿指軍符轉佩風雲暗鳴輦錦綉趨雪花頻落粉
香汗盡流珠掩笑誰欺令嚴刑必用誅至今孫子術猶
可靜邊隅

粲登建中進士第

葉季良

吳宮教美人戰詩云強吳矜霸略講武在深宮盡出嬌
娥妓先觀上將風揮戈羅袖卷擐甲汗粧紅掩笑分旗
下含羞入隊中鼓停行未正刑舉令纔崇自可威鄰國
何勞逞戰功

季良登貞元進士第

陳通方

通方金谷園懷古云緩步洛城下軫懷金谷園昔人隨

水遊舊樹逐春繁
冉冉搖風弱
菲菲裊露翻
歌臺豈易見
舞袖乍如存
戲蝶香中起
流鶯暗處喧
徒聞施錦帳
此地擁行軒

通方登貞元進士第
與王播同年
播年五十六
通方甚少
因期集撫播背曰
王老奉贈一第
言其日暮途遠
及第同贈官也
播恨之後
通方丁家艱
辛苦萬狀
播捷三科
為正郎判鹽鐵
通方窮悴
求助不甚
給之時
李虛中為副使
通方以詩求為汲引
云應念路傍憔悴
翼昔年

喬木幸同遷播不得已薦為江西院官

嚴公弼

題漢州西湖云西湖創置自房公心匠縱橫造化同見
說鳳池推獨步高名何事滯川中

公弼公貺嚴震之子震梓州人建中中為鳳州刺史治
行為山南第一封鄖國公公弼襲封

嚴公貺

題漢州西湖云鳳沼才難盡餘思鑿西湖珍木羅脩岍

水光映坐隅琴臺今寂寞竹島尚縈紆猶蘊濟川志芳
名終不渝

柳子厚序送公貺下第歸興元覲省云相國馮翊公極
人臣之尊分天子之憂殿邦坤隅柄是文武而子之伯
仲皆脫略貴美服勤儒素故繼登上科以及於子是可
舉嚴氏之教誦乎他門使有矜式也子何患賈之不售
耶

王表

大歷十四年侍郎潘炎試花發上林苑表詩云御苑春
何早繁花已繡林笑迎明主仗香拂美人簪地接樓臺
近天垂雨露深晴光來戲蝶夕景動棲禽欲託凌雲勢
先開捧日心方知桃李樹從此別成陰

清明日登城春望寄大夫使君詩云春城閑望愛晴天
何處風光不眼前寒食花開千樹雪清明日出萬家煙
興來促席唯同舍醉後狂歌盡少年聞說鶯啼却惆悵
詩成不見謝臨川

元微之叙詩寄樂天詩云有人以陳子昂感遇詩相示
吟翫激烈即日為寄思元子詩二十首故鄭京兆於僕
為外諸翁深賜憐獎因以獻京兆翁深相駭異秘書少
監王表在座願謂表曰使此兒五十不死其志義何如
哉惜吾輩不見其成就因召諸子訓責泣下僕亦竊不
自得由是勇於為文又久之得杜甫詩數百首愛其浩
蕩津涯處處皆到始病沈宋之不存寄興而訝子昂之
未暇旁備矣不數年與詩人楊巨源友善日課為詩性

復僻嬾人事常日閑則有作識足下時有詩數百篇矣
表大歷十四年潘炎下登第時謂勝有六異朱遂為朱
滔太子表為李納聳彼軍呼為附馬趙博宣為易定押
衙袁同直入番為阿師竇常二十年稱前進士其一奚
陟也或曰六差

陸贄

太歷八年試禁中春松云陰陰清禁裏蒼翠滿春松雨
露恩偏近陽和色更濃高枝分曉日虛吹雜宵鐘嵐助

爐煙遠形疑蓋影重願符千載壽不羨五株封幸得回
天眷全勝老碧峰

錢起喜贄擢第還蘇州云鄉路歸何早雲間喜擅名思
親盧橘熟帶雨客帆輕夜火臨津驛晨鐘隔浦城華亭
養仙羽計日再飛鳴

楊炎

流崖州至鬼門關作云一去一萬里千知千不還崖州
何處在生度鬼門關

元載末年納薛瑤英為姬處以金絲帳却塵褥衣以龍
綃衣載以瑤英體輕不勝重衣於異國求此服也唯賈
至與炎雅與載善往往時見其歌舞至贈詩曰舞怯銖
衣重笑疑桃臉開方知漢成帝空築避風臺炎亦贈歌
云雪面淡眉天上女鳳簫鸞翅欲飛去玉山翹翠步無
塵楚腰如柳不勝春

炎字公南常袞長於除書炎善德音自開元後言制詔
者稱常楊元載與炎同郡炎之出也故擢炎禮部侍郎

德宗時位宰相

元季川

泉上雨後作云風雨蕩繁暑雷息佳霽初衆風帶雲雨
清風入我廬颭颭涼颭來臨窺愜所圖緣蘿長新蔓裊
裊垂坐隅流水復簷下丹砂發清蕖養葛為我衣種芋
為我蔬誰是畹與畦彌漫連野蕪

山中晚興云河漢降元霜昨來節物殊媿無神仙姿亦
有陰陽俱靈鳥望不見慨然悲高梧華葉隨風揚珍條

雜榛蕪為君寒谷吟歎息知何如

季川大歷貞元間詩人也一曰季川名融元次山之弟也次山作處規云季川曰甦復不言甦有意乎

甦兄之別稱也

蔣渙

和徐侍郎書叢篠韻云中禁夕沉沉幽篁別作林色連
鷄樹近影落鳳池深為重凌霜節能虛應物心年年承
雨露長對紫庭陰

渙儀鳳宰相智周之孫與兄洌皆第進士渙永泰初歷

鴻臚卿日本使嘗遺金帛不納唯取牋一番以貽其副
云終吏部尚書洌終尚書左丞

包何

江上田家云近海川原薄人家本自稀黍苗期臘酒霜
葉是寒衣市井誰相識漁樵夜始歸不須騎馬問恐是
狎鷗飛

同諸公尋李方直不遇云聞說到揚州吹簫有舊遊人
來多不見莫是上迷樓

和苗員外寓直寄臺中舍弟云朝列稱多士君家有二
難貞為臺裏栢芳作省中蘭夜直分曹閣晨趨接武歡
每憐雙闕下鴈序入鴛鸞

闕下芙蓉云一人理國致昇平萬物呈祥助聖明天上
河從闕下過江南花向殿前生慶雲垂蔭開難落湛露
為珠滿不傾更對樂懸張宴處歌工欲奏採蓮聲

賦得秤送雲孺卿云願以金錘秤因君贈別離鈎懸新
月吐衡舉衆星隨掌握須平執錙銖必盡知由來投分

定莫被弄權移

何字幼嗣融之子也大歷中為起居舍人

劉商

秋夜聽嚴紳巴童倡竹枝歌云巴人遠從荆山客回首
荆山楚雲隔思歸夜倡竹枝歌庭槐葉落秋風多曲中
歷歷叙鄉土鄉思綿綿楚詞古身騎吳牛不畏虎手提
篋笠欺風雨猿啼日暮江岼邊綠蕪連山水連天來時
十三今十五一成新衣已再補鴻鴈南飛報隣伍在家

歡樂辭家苦天晴露白鐘漏遲淚痕滿面看竹枝曲終
寒竹風裊裊西風落日東風曉

移居深山謝別親故云不食黃精不採薇葛苗為帶草
為衣孤雲更入深山去人絕音書鴈自飛

商高情放遊戲為山水木石自張璪貶後惆悵賦詩曰
苔石蒼蒼臨澗水溪風裊裊動松枝世間唯有張通會
流向衡陽那得知

商彭城人居長安劉禹錫作高陵令劉仁師遺愛碑云

武德名臣刑部尚書德威三代孫大歷中詩人商之猶
子其名重如此商終於檢校禮部郎中汴州觀察判官
胡笳銅雀妓云魏主矜娥眉美人美於玉高臺無晝夜
歌舞竟未足盛色如轉圜夕陽落深谷仍令身歿後尚
縱平生慾紅粉淚縱橫調絃向空屋舉頭君不在唯見
西陵木玉輦豈再來嬌鬟為誰綠那堪秋風裏更舞陽
春曲曲罷情不勝闌干向西哭臺邊生野草來去罨羅
縠况復陵寢間雙雙見麋鹿

古意云連曙寢衣冷開門霜露凝風吹昨夜淚一片枕
前冰

滑州送人先歸云河水冰銷旅鴈飛寒衣未足又春衣
自憐飄蕩經年客送別千迴獨未歸

陸海

陸餘慶與陳子昂盧藏用為方外十友孫海工於五言
為賀賓客所賞自省郎典潮州但賦詩自適

題奉國寺云新秋夜何爽露下風轉淒一磬竹窻外千

燈花塔西

題龍門寺云窻燈林靄裏門磬水聲中更與龍華會爐
煙滿夕風

孫長源有才思嘗為諷刺云忽然一曲稱君心破却中
人百家產又云城外平人驅欲盡帳中猶打袞花毬

唐詩紀事卷三十二